

## Protocol

dalla seduta dil cussegl da vischnaunca,  
venderdis, ils 5 da december 2025: allas 18<sup>00</sup> – 19<sup>215</sup>  
Liug: Stanza da sedutas Cumiera, Center Fontauna

---

Presidi: Adrian Flepp

Actuar: Ervin Maissen, Administraziun communal

Presents:

|            |                                                                                                               |                                                                                  |
|------------|---------------------------------------------------------------------------------------------------------------|----------------------------------------------------------------------------------|
| a) Cussegl | Theres Burri Gadola<br>Silvio Candinas<br>Felicia Deflorin<br>Adrian Flepp<br>Remo Huonder<br>Admir Jasarevic | Christian Loretz<br>Giusep Lozza<br>Lucas Lutz<br>Rafael Maissen<br>Ignaz Venzin |
|------------|---------------------------------------------------------------------------------------------------------------|----------------------------------------------------------------------------------|

|            |                                      |                               |
|------------|--------------------------------------|-------------------------------|
| perstgisas | Silvia Bucheli-Caduff<br>Otmar Flepp | Placi Flury<br>Alfred Spescha |
|------------|--------------------------------------|-------------------------------|

|                            |                                                 |                                     |
|----------------------------|-------------------------------------------------|-------------------------------------|
| b) Suprastonza<br>communal | René Epp<br>Clemens Berther<br>Wendelin Jacomet | Jris Lombris<br>Paul Flurin Schmidt |
|----------------------------|-------------------------------------------------|-------------------------------------|

|                            |                                  |  |
|----------------------------|----------------------------------|--|
| c) Cumissiun da<br>gestiun | Andrea Fry-Betschart, presidenta |  |
|----------------------------|----------------------------------|--|

|          |                                                                      |  |
|----------|----------------------------------------------------------------------|--|
| d) Cader | Roland Cajacob, meinafatschenta<br>Romeo Schmed, menader da finanzas |  |
|----------|----------------------------------------------------------------------|--|

|          |            |  |
|----------|------------|--|
| e) Hosps | 2 personas |  |
|----------|------------|--|

## Plaid d'avertura dil president:

"Avon biebein 11 meins hai jeu astgau surprendre il tgamun dil cussegl da vischnaunca per igl onn 2025 ed aschia instradar la nova perioda d'uffeci dils gremis politics dalla vischnaunca da Mustér. Tenor miu sentiment ei quei onn mo sgulaus sperasvi. Cun oz, essan nus serendi a 10 sedutas, cun total 31 tractandas e decidiu davart 15 messadis. Duront igl onn havein nus tractau differentas impurtontas fatschentas. Talas che han cuzzau onns, gie schizun decennis avon ch'ellas ein stadas maderas per il cussegl da vischnaunca e silsuenter per la populaziun. Nus havein denter auter approbau il niev reglament per igl uorden da fatschentas dalla suprastanza communal, approbau differentes credits per vias, sco la Via Cons e tractau las grondas fatschentas dalla planisaziun locala ed igl acquist da schischom dils artavels Couchepin-Hess. Ad omisduas fatschentas ha era il suveran detg dacuort clar GIE all'urna.

Igl ei pia stau in fetg interessant, informativ denton era intensiv emprem onn dalla perioda d'uffeci 2025/2028. Persunalmein ei sper la seduta constitutiva era la seduta extramuros stai puncts culminonts dad uonn.

Suenter igl emprem onn dalla perioda d'uffeci, savein nus trer ina bilanza fetg positiva.

La collaboraziun denter la suprastanza communal ed il cussegl da vischnaunca ha funcziunau fetg bein. Ei ha dau bia discussiuns ed impurtontas debattas duront las tractaziuns, per part extendidas, denton sun perschuadius che las decisiuns pridas ein stadas comunablamein e per il beinstar da nossa vischnaunca.

Preziadas concusseglieras e stimai concusseglers - Jeu giavischel, era che vus reflecteis igl onn vargau e vegnis pertscharts tgei impurtonta funcziun che nus sco cussegl havein. Nus essan vegnir elegi dil pievel - per il pievel. Nus stuein pia prender bein ponderadas decisiuns, representar differentes meinis ni gruppaziuns e stuein comunablamein anflar la via anavon per la vischnaunca. Perquei seigies pertscharts che vus stueis seprofundar en tutta materia, formar vies meini ed era representar quel cun vossa presenza al cussegl.

A mi eis ei stau ina honur d'astgar tgamunar il cussegl da vischnaunca d'uonn. Ei fa grond plascher da veser il svilup prospereivel sisum la Surselva e da s'engaschar en ina vischnaunca aschi activa sco Mustér. Aschia less engraziar a vus tuts per la confidanza demussada enviers mia persuna.

Jeu less era engraziar en special a mes premurai collegas dil biro dil cussegl per ils fritgeivel inscuters, al meinafatschenta Roland per siu sustegn, sco era ad Ervin ed Romeo per far protocol duront nossas sedutas. Plinavon less era engraziar als commembers dalla suprastanza communal per lur engaschi ed anim, en lur impurtonts ed intensivs posts.

Cun quels plaids termineschel miu davos plaid sco president dil cussegl da vischnaunca. Jeu selegrel da puspei seser denter vus e prender part allas tractaziuns e dallas debattas."

## Mortoris:

Dapi la davosa seduta dil cussegl da vischnaunca ha ei dau suandonts mortoris:

- Corsin Huonder-Tenner, naschius ils 01.06.1962 e morts ils 16.11.2025
- Giachen Antoni Casanova-Tönz, naschius ils 17.04.1953 e morts ils 17.11.2025
- Adriano Seglio, naschius ils 6 da matg 1936 e morts ils 3 da december 2025

## Naschientschas:

Dapi la davosa seduta dil cussegl da vischnaunca ha ei dau neginas naschientschas:

## Tractandas:

1. Protocol 9-2025/2028
2. Aboliziun dil "Regulativ Biblioteca populara Disentis/Mustér e contuorn" (messadi 13-2025/2028)
3. Cumissiun da finanzas – elecziun da cusseglier(a)s (messadi 14-2025/2028)
4. Agenda 2026 (messadi 15-2025/2028)
5. Ura da damondas (conform ad art. 44 dil regulativ da fatschentas)
6. Elecziuns:
  - 6.1 dil vicepresidente ni dalla vicepresidente communal(a) per 2026
  - 6.2 dil president ni dalla presidenta dil cussegl da vischnaunca per 2026
  - 6.3 dil vicepresidente ni dalla vicepresidente dil cussegl da vischnaunca per 2026

Cussegl da vischnaunca Disentis/Mustér

Adrian Flepp  
president

Ervin Maissen  
actuar

## 1. Protocol

Protocol 9-2025/2028 dil cussegl da vischnaunca dils 5 da november 2025. Enteifer il termin fixau ei vegniu inoltrau ina proposta per ina midada. La midada proponida ei indicada el text cun color blaua. Ei vegn giavischau neginas ulteriuras midadas.

### *Decisiun:*

*Il protocol 9 – 2025/2028 dalla seduta dil cussegl da vischnaunca dils 5 da november 2025 vegn approbaus unanimamein.*

Cussegl da vischnaunca Disentis/Mustér

Adrian Flepp  
president

Ervin Maissen  
actuar

## 2. Aboliziun dil "Regulativ Biblioteca populara Disentis/Mustér e contuorn" (messadi 13-2025/2028)

### *Presentaziun;*

#### *Geraua Jris Lombris*

La geraua Jris Lombris presenta cuort il messadi 13-2025/2028 e las ponderaziuns dalla suprastanza communal leutier. Specialmein menziunescha ella era las midadas ch'ei sedadas al tgamun dalla biblioteca. Cun quella caschun han ins vuliu simplificar las structurass dalla biblioteca. Ulteriuramein duei mintga collaboratur disponer el futur d'in contract da lavur.

### *Debatta d'entrada;*

Cussegl da vischnaunca: Co separticipeschan las vischnauncas vischinontas finanziamein vid ils cuosts da menaschi dalla biblioteca? Vegn ei era fatg diever da personas d'ordeifer dalla purschida dalla biblioteca populara?

Suprastanza communal: La vischnaunca da Tujetsch paga annualmein ina contribuziun da frs. 5'000.--, Medel frs. 1'000.-- e Sumvitg frs. 500.--. Ils cuosts totals annuals dalla vischnaunca per la biblioteca muntan a rodund frs. 41'000.--. Ils abonnaments serepartan sco suonda, Mustér 200, Tujetsch 62, Medel 12, Trun e Sumvitg 30 ed ulteriurs 26.

Cussegl da vischnaunca: Beneventa la sligaziun da delegar dapli cumpetenzas alla suprastanza communal. La biblioteca ei ina buna ed impurtanta purschida per la qualitat da nies liug mo era per la promoziun dil lungatg romontsch. Han ins ponderau d'involver pli fetg las vischnauncas vischinas concernent la collaboraziun e gl'engaschi finanziel. Co sefar la collaboraziun denter la biblioteca ed il gimnasi claustral?

Suprastanza communal: La collaboraziun cul gimnasi ei plitost magra cun quei ch'il gimnasi dispona d'ina atgna biblioteca. Cun las vischnauncas han ins encuretgi in pli stretg contact. Quei ei stau pusseivel en connex cun l'acziun ch'ei vegnida fatga a caschun dil giubileum dalla biblioteca populara en favur dallas scolaras e dils scolars. Quella acziun ei vegnida sustenida dallas vischnauncas Sumvitg cun frs. 2'000.--, Medel frs. 1'000.-- e Tujetsch frs. 3'000.--. Las vischnauncas da Sumvitg e Medel han denton communicau ch'ei setracti d'ina contribuziun singula ed in pli grond susteniment vegni el futur buca en damonda. La vischnaunca da Tujetsch mantegn el futur sia contribuziun da frs. 5'000.--. Pil mument han ins buca menau pli grondas contractivas cun las vischnauncas vischinas.

Cussegl da vischnaunca: Fuss ei pusseivel d'integrar el futur la purschida dalla biblioteca ella carta d'aur, che para pil mument da secumprovar. La collaboraziun enteifer la regiun duess sche pusseivel vegnir intensivada.

Suprastanza communal: Schebein ins sa integrar la purschida dalla biblioteca ella carta d'aur vegn il temps a mussar. En mintga cass vegn ins a tener en egl quella pusseivladad. Sper la biblioteca organisescha la vischnaunca da Tujetsch singulas activitads. Ina buna purschida dalla biblioteca ei denter auter la pusseivladad ch'affons che han tema da leger da saver leger avon senza squetsch da prestaziun.

*Deliberaziun en detagl;*

Il cussegl da vischnaunca desista da menar ina discussiun en detagl davart la fatschenta.

*Decisiuns:*

*Sin fundament da sura ponderaziuns decida il cussegl da vischnaunca unanimamein:*

1. *d'abolir il «Regulativ Biblioteca populara Disentis/Mustér e contuorn», approbaus ils 9 da november 2012.*
2. *prender enconuschientscha dalla nova «Ordinaziun Biblioteca Mustér e contuorn» cun vigur legala naven digl 1 da schaner 2026.*

Cussegl da vischnaunca Disentis/Mustér

Adrian Flepp  
president

Ervin Maissen  
actuar

### 3. Cumissiun da finanzas – elecziun da cusseglier(a)s (messadi 14-2025/2028)

#### *Presentaziun;*

##### *President communal*

Il president communal presenta cuort il messadi 14-2025/2028 e las ponderaziuns dalla suprastanza communal leutier.

#### *Debatta d'entrada;*

Cussegl da vischnaunca: cusseglier Ignaz Venzin ha gia giu communicau sias ponderaziuns en connex cun la cumissiun da finanzas. El ei vinavon dil meini ch'ei fetschi buca basegns da crear in gremi supplementar per tractar las finanzas communalas. Cusseglia Felici Deflorin propona cussegliera Silvia Bucheli ed ils cussegliers Remo Huonder ed Admir Jasarevic sco commembers per la cumissiun da finanzas.

#### *Deliberaziun en detagl;*

Il cussegl da vischnaunca desista da menar ina discussiun en detagl davart la fatschenta.

#### *Decisiun:*

*Cun 10 encunter 0 vuschs ed ina abstenziun elegia il cussegl da vischnaunca suandontas persunas ord igl agen ravugl entochen la fin dalla perioda d'uffeci 2025-2028, ella cumissiun da finanzas:*

- *Silvia Bucheli-Caduff*
- *Remo Huonder*
- *Admir Jasarevic*

Cussegl da vischnaunca Disentis/Mustér

Adrian Flepp  
president

Ervin Maissen  
actuar

#### 4. Agenda 2026 (messadi 15-2025/2028)

##### *Presentaziun;*

Il president communal René Epp presenta l'agenda che preveda suandontas sedutas dil cussegl da vischnaunca igl onn 2026. El visa vi sin enzacontas impurtontas fatschentas che vegnan suttamessas el decuors digl onn proxim al cussegl da vischnaunca, sco; la revisiun dalla constituziun communal, la sanaziun cumplexsiva dalla serenera Raveras, il luvratori communal a Cuo, la cuntinuaziun dil project parcella Couchepin-Hess e l'adattaziun dallas taxas da hosps e da turissem.

##### *Discussiun generala;*

Cussegl da vischnaunca: ein ils termins vegni coordinai cun l'agenda dad exerceris dils pumpiers? Ei duei buca esser ch'in cusseglier che separticipescha alla seduta sto perquei ch'el ei buca staus presents als exerceris pagar castitg.

Vicepresidenta cussegl da vischnaunca, suprastanza communal: Ils exerceris da pumpiers ein aunc buca publicai perquei eis ei buca stau pusseivel da risguardar quels termins. La suprastanza communal coordinescha ils termins cul biro dil cussegl. Il termins ston denton era corrispunder als termins da seduta dalla suprastanza communal, preparaziun dils messadis pil cussegl da vischnaunca e tenor situaziun als termins da votaziun gia defini entras la confederaziun. Mintga pumpier sto absolver annualmein silmeins 9 exerceris. El ha la pusseivladad d'eleger ord ina schelta da ca. 25 termins.

Cussegl da vischnaunca: in problem sa sedar pils cuors cantunals da specialists.

Pigl onn 2026 ei vegniu definiu suandonts termins da seduta:

- Mesjamna, 28-01-2026
- Gliendisdis, 23-03-2026
- Gliendisdis, 04-05-2026
- Mesjamna, 17-06-2026
- Venderdis, 21-08-2026
- Mesjamna, 28-10-2026
- Venderdis, 04-12-2026

##### *Decisiuns:*

*Il cussegl da vischnaunca pren enconuschiantscha dall'agenda 2026.*

Cussegl da vischnaunca Disentis/Mustér

Adrian Flepp  
president

Ervin Maissen  
actuar

## 5. Ura da damondas

Alla suprastanza communal ei vegniu inoltrau duas damondas a scret. La suprastanza communal pren posiziun sin suandontas damondas ord il miez dil cussegl da vischnaunca.

### Cusseglia Placi Flury

#### Damonda:

A mei ei vegniu ad ureglia che il biro dil SDT (Sedrun Disentis Turissem) dueigi vegnir integraus el Center Fontauna. Quei en la localitad dil meinafatschenta. Il meinafatschenta dueigi survegnir siu niev biro en las localitads da termagliar dils affons, las qualas dueigien vegnir sligiadas si. Quei dad da studegiar, cun quei ch'ei ha giu a caschun dalla sanaziun dil CF, ch'ei hagi nunpusseivel spazi per quei biro.

Tenor mias enconuschientschas, han SDT e la Posta silsunter schau elaborar in project per integrar il biro da SDT en las localitads dalla Posta a Mustér.

Enteifer quei temps, ei il Center Fontauna vegnius baghegius entuorn e carmala ussa dabia hosps cun famiglias e turists el Center.

Secapescha eis ei normal ch'ei dad reclamaziuns, denton senza surfar, sche tut las reclamaziuns vegnessen pridas adina aschi serius sco quellas davart il local da termagliar pils affons, vegness ei aunc da midar bia.

A mei eis ei nuncapeivel pertgei ch'ins dislochescha per l'ina il biro da cura e traffic ord il vitg, cura ch'ei ha giu num ellas davosas sesidas che il center dil vitg dueigi vegnir activaus. Plinavon eis ei per mei nuncapeivel pertgei ch'ei vegn investau ina massa daners (en urdeins per affons, uorden d'affons e plaz da seser per geniturs,) per suenter 2 onns lu puspei allontanar quei. Quels urdeins survegnan probabel buca in auter liug el CF.

Causa finanziaria jeu sperel buc che la vischnaunca hagi giu cuosts cun SDT e la Posta cun gliez project ed era ussa buca cuosts, era buca en cumbinaziun cul preventiv dil CF.

Cun quella damonda havessel bugen sclariment dalla suprastanza communal, sche quellas midadas ein enconuschentas ad ella, sco era da prender posiziun enviers quellas damondas.

Fracziun da cussegliers cun affons.

#### **Risposta (president communal René Epp):**

La suprastanza communal ei pertscharta che mintga purschida el Center Fontauna ei custeivla, era il local da termagliar pils affons. La basa per la midada d'intent da quella localitad ei, ch'ins ha planisau da dislocar il post d'informaziun da SDT naven dalla staziun el Center Fontauna. Ils motivs persunter ein, che SDT ha gia daditg mess en damonda la localitad el baghetg dalla staziun dalla viafier e che nos hosps, che sesanflan per gronda part ella regiun dil Center Fontauna, Catrina Resort e Pendicularas, van pil pli al spurtegl dallas pendicularas ni dil Catrina Ressort per cussegl, che da serender el vitg tier il post d'informaziun. Aschia han era las pendicularas annunziav siu giavisch resp. clamau per sustegn. Cun in eventual project dil Center d'indoor per famiglias ed affons survegn quei areal el futur aunc dapli activitad che entochen dacheu. Ina dislocaziun dil post d'informaziun el Center Fontauna purschess aschia la pusseivladad da nezegiar optimalmein sinergias. Il center d'informaziun ei consequentamein plazaus pli datier dil center turistic ed ils hosps serendan el Center Fontauna per cussegl e vesan aschia gest las purschidas ni visetan forsa era la cafetaria, l'Onda Gada. Cun il niev project dil parc da giugs e moviment vegnan -sco gia menziunau- aunc marcant dapli personas a setener si ella regiun dil Center Fontauna.

Il sulet liug el Center Fontauna ch'ei adattaus per plazzar il post d'informaziun da SDT ei il biro dil meinafatschenta visavi la cafetaria. Quei ei maneivel dall'entrada e dalla cafetaria ed aschia bein visibels. Quei munta denton, che nus stuein era dislocar il biro dil meinafatschenta e ses collaboraturs. Plinavon vegn SDT era a drizzar en in ni dus plaz da lavur a Mustér, complementar tiel post da cussegliaziun, ils quals han buca plaz el biro dil meinafatschenta. En tut drova ei pia 4-5 plazs da lavur da biro e per quei intent vegn mo il local dall'anteriura cafetaria en damonda. Buca d'emblidar ei ch'ins savess aschia tgunsch haver temps d'avertura sur 364 dis ad onn.

Ils urdeins pils affons en quei local duessen vegnir mess dalla vart e puspei mess a disposiziun ed utilisai el rom dil niev parc da giugs e moviment. Nus sperein che quei project sappi vegnir realisau ils proxims 1-2 onns, aschia ch'ei dess sulettamein ina interrupziun minimala da quella purschida per affons. En cass ch'il project dil parc da giugs e moviment savess buca vegnir realisau vegn la cumissiun da menaschi a far las ponderaziuns necessarias tgei pusseivladad ch'ei dess da tuttina metter a disposiziun ina semeglionta purschida.

Entochen ussa han las contractivas en connex cun il biro da SDT generau negins cuosts alla vischnaunca. Davart las investiziuns ellas novas localitads vegn SDT a separticipar finanziamein el medem rom sco igl ei vegniu fatg ellas localitads da Tujetsch. A Sedrun ei vegniu investau da lu temps en mobiliar ina summa da rodond 25'000 tochen 30'000. Plinavon vegn il CF el futur a survegnir in tscheins d'affittaziun pil biro da SDT, medemamein analog maximal ell'altezia dil biro en Tujetsch. Era cheu sa il CF quintar cun ina biala entrada.

Pia, la dislocaziun dil biro fa en tuts graus senn e dat ulteriuras bunas sinergias. La realisaziun dil project ensemen cun ils responsabels da SDT ei previus ils proxims meins. E sco finiziun aunc il suandont: Nies center dil vitg vegn ins buca d'activar cun mantener in biro che ha buca frequenzas. Per propi dar slontsch a nies center dil vitg drova ei commerci ed ulteriuras fatschentas che vegnan da supportar economicamein. Sche quei gartegia a nus havein nus fatg tut endretg. Grazia alla votaziun la davosa fin d'jamna havein nus fatg en quei grau igl emprem impurtont pass.

## Cusseglier Placi Flury

### Damonda:

Sch'ins va a far cumissiuns durant la stagiun aulta, dat ei en egl che las treis stizuns da victualias ein actualmeins al limit. Seigi quei cun igl unviern il Coop cun ils resorts Reka e Catrina, ni la stad il Volg ed il Spar cun ils turists dil campadi.

Ei dat da ponderar a mei, cura che jeu vesel quella situaziun e ch'il resort Catrina duei vegnir engrondius ed il resort Acla da Fontauna duegi aunc vegnir baghegiaus. Senza malegiar ner, cheu ei il chaos garantius, era arisguard il fatg ch'il stradun denter Sumvitg e Muster sa vegnir serraus durant igl unviern.

Mirau regional spetga era Sedrun aunc sin in grond resort turistic, che pudess segir era haver influenza sil svilup dallas stizuns da Mustér.

Ha la suprastanza era schon fatg ponderaziun sco jeu? Igl avegnir vegn a purtar ina massa sfidas sche tut ils projects vegnan realisai.

Sa la suprastanza intervegnir en connex cun las anteriuras localitads dil Coop? Sco jeu sundel el maletg vuleva in grond distribuir naziunal far diever da quellas localitads, denton ha il Coop, che ha affittau quellas localitads ella Cucagna pli bugen sche quellas restan vitas, che da schar vegnir la concorrenza a Mustér. Cheu in vischin che profitescha, sin donn e cuost dil beinstar communal vertent e futur.

En mes egls stuess la vischnaunca vegnir activa arisguard ils suranumnai problems.

## Risposta (president communal René Epp):

Las stizuns, cunzun il COOP el Catrina Ressor, ein segiramein fetg sut squetsch, quei denton cunzun duront la sesiun aulta. Ei setracta cheu da paucas jamnas ad onn, sche insumma. Era duront la stad marscha bia ellas stizuns dil vitg, denton lunsch buca el medem rom sco igl unviern.

La localitad veglia dil COOP ella casa dalla Cucagna ei affittada vinavon dil COOP. Ei setracta cheu d'ina affittaziun privata nua che la vischnaunca ha buca la pusseivladad d'intervegnir activamein. Sulettamein el cass che nus havessen enconuschientscha d'in eventual interessent concret per quellas localitads, savessen nus tut tenor, encurir il discuors cugl affittader. Mo gliez ei actualmein buca il cass. La localitad ei muort la situaziun da parcadis forsa era meins adattada ni interessanta per ina stizun da victualias sco menziunau ella damonda.

Sco en biars auters loghens da turissem ei l'aulta occupaziun in problem dallas sesiuns. Duront paucas jamnas ad onn duvrass ei dapli e duront tut igl auter temps ei la purschida pli che gronda avunda. En quei connex vegn la fiera denton segir a giugar. Aschia essan nus perschuadi, ch'ei vegn a dar fatschentas che han interess da porscher ulteriuras pusseivladads da comprar en, sch'il svilup da nosa vischnaunca va ella dretga direcziun e sch'il potenzial persuerter ei avon maun. Cugl acquist dalla parcella Hess-Couchepin amiez il vitg ei igl emprem impurtont pass en quella direcziun fatgs. Activitads, pusseivladads e schanzas per il commerci amiez nies vitg ein aschia garantidas.

## Damondas a bucca

Cussegl da vischnaunca: Pil meinafatschenta dil Center Fontauna sedad puspei la necessitad da midar casa. Il fatg ch'el sto secasar leu nua ch'ils spazi da termagliar pils affons (indoor) sesanfla ussa ei buca optimalis pil biro mo era dil fatg che las construcziuns installadas el local vegnan suenter cuort temps pridas ord funcziun ed ils urdeins cumprai per quei intent vegnan ord diever.

Suprastonza communal: Igl ei sedau la situaziun ch'il biro d'informaziun da Sedrun Mustér turissem duei vegnir endrizzaus el CF, perquei ch'il center sesanfla pil maneivel allas differentas purschidas turisticas ch'il Vitg. Per ch'il biro d'informaziun seigi beinvesibels per la clientella vegn il biro installaus el biro actual dil meinafatschenta dil CF. Cun la realisaziun dil niev baghetg per indoor duess la situaziun pil biro dil meinafatschenta lu era semeglierar. Denton duei la part restonta digl actual local survir vinavon entochen che la halla dad indoor ei realisada sco local da termagliar. Ils urdeins che surveschan oz pil local da termagliar duein denton vegnir mess d'ina vart a puspei star a disposiziun per lur intent.

Cussegl da vischnaunca: Eis ei necessari da schaffir in reglament resp. ina basa legala per la cumissiun da finanzas dil cussegl da vischnaunca?

Suprastonza communal: ei para buca necessari da schaffir ina basa legala persuerter. Sche pusseivel vul ins reglar quei da maniera sempla senza regulativs.

Cussegl da vischnaunca Disentis/Mustér

Adrian Flepp  
president

Ervin Maissen  
actuar

## 6. Elecziuns

### 6.1 dil vicepresidente ni dalla vicepresidente communal(a) per 2026

Per la perioda 2025/2028 ha la suprastonza communal cuntrari all'usanza dils decennis vargai, decidiu da schar rotar il vicepresidente denter ils commembers dalla suprastonza communal, aschia ch'ei vegn eligiù mintg'onn ina nova vicepresidente ni in niev vicepresidente per la suprastonza communal.

Il president da vischnaunca René Epp propona genau Paul Flurin Schmid sco vicepresidente communal per igl onn 2026.

Neginas ulteriuras propostas. Ei vegn buca giavischau in elecziun cun scrutini, aschia che quella suonda cun alzar il maun.

#### *Decisiun;*

Il cussegl elegia unanimamein genau Paul Flurin Schmid co vicepresidente communal per igl onn 2026.

Il nieveligiù vicepresidente communal ha stuiu s'absentar per motivs familiars urgentamein cuort avon l'elecziun

### 6.2 dil president ni dalla presidenta dil cussegl da vischnaunca 2026

Adrian Flepp, president dil cussegl propona la vicepresidente Theres Burri Gadola sco nova presidenta dil cussegl da vischnaunca 2026.

Neginas ulteriuras propostas. L'elecziun succeda a basa digl art. 11 al. 4 dil regulativ da fatschentas tenor scrutini.

#### *Decisiun;*

Resultat dil scrutini :

|                              |                     |
|------------------------------|---------------------|
| Repartiu cedels :            | 11                  |
| Returnau cedels :            | 11                  |
| Cedels vits :                | 1                   |
| Cedels nunvaleivels :        | 0                   |
| Cedels vits e nunvaleivels : | 1                   |
| Cedels valeivels :           | 10                  |
| Vuschs da candidats :        | 10                  |
| Absolut pli :                | 6                   |
| Vuschs han obteniu :         | Theres Burri Gadola |

Cusseglia Theres Burri Gadola ei eligida cun 10 vuschs sco presidenta dil cussegl da vischnaunca pigl onn 2026. Il president Adrian Flepp gratulescha cordialmein alla niev eligida presidenta dil cussegl da vischnaunca.

Ei suonda il plaid dalla niev eligida presidenta dil cussegl da vischnaunca Theres Burri Gadola:

Theres Burri engrazia cordialmein per la honorifica elecziun. Ella engrazia era allas uniuns ella quala ella anflau la pusseivladad d'emprender il lungatg romontsch e che han dau ad ella pusseivladad da s'engaschar publicamein. Engraziel fetg per la confidanza demussada cun quella honorifica elecziun.

### 6.3 dil vicepresidente ni dalla vicepresidente dil cussegl da vischnaunca 2026

Cusseglia Lucas Lutz propona sco niev vicepresidente dil cussegl da vischnaunca, cusseglier Rafael Maissen.

Neginas ulteriuras propostas. L'elecziun succeda tenor scrutini.

Resultat dil scrutini :

|                              |                |
|------------------------------|----------------|
| Repartiu cedels :            | 11             |
| Returnau cedels :            | 11             |
| Cedels vits :                | 1              |
| Cedels nunvaleivels :        | 1              |
| Cedels vits e nunvaleivels : | 2              |
| Cedels valeivels :           | 9              |
| Vuschs da candidats :        | 9              |
| Absolut pli :                | 5              |
| Vuschs han obteniu :         | Rafael Maissen |

#### Decisiun:

Cusseglia Rafael Maissen ei eligius cun 9 vuschs sco vicepresidente dil cussegl da vischnaunca pigl onn 2026. Il president Adrian Flepp gratulescha cordialmein al nieveligiu vicepresidente per la honorifica elecziun.

Ei suonda il plaid dil nieveligiu vicepresidente dil cussegl da vischnaunca Rafael Maissen:

Rafael Maissen engrazia per la honorifica elecziun e per la confidanza demussada enviers el.

Il president dil cussegl Adrian Flepp admetta als nieveligi sinceras gratulaziuns e buns giavischs.

#### Communicaziuns

Suprastonza communal: Ils 16 da schaner 2026 ha liug la surdada dil Premi Desertina ella sala Peter Kaiser. Cun quella caschun vegn era Armon Orlik il "retg dils lutgaders Svizzers" ad esser presents.

La proxima seduta dil cussegl da vischnaunca ha liug mesjamna, ils 28 da schaner 2026 el Center Fontauna.

Cussegl da vischnaunca Disentis/Mustér  
Il president: Igl actuar:

Adrian Flepp

Ervin Maissen

Disentis/Mustér, ils 20 da december 2025